

SUKESUKEGA O TE VAIASO

TAPU 13-16 Apelila 2014



Fakatokagina ne: Rev. Fitilau Puapua
Ulu Ofisa o te EKT
Funafuti

FAKATOMUAGA: I te ava mo te fakaaloalo ko fiafia au o fakailoa atu me e tenei te fakatokaga mo Sukesukega a tatou mo te vaiaso Tapu o te tausaga tenei 2014. E pela e iloa mo te masani a te fakatokaga tenei mo fesoasoani ke tai tasi tatou i te taumafaiga ke maua ne tatou te lagona taua o te vaitau tenei kae ko fakasoasoa atu ne oulua ‘malu te avatuga o lesona a tatou ki oulua Ekalesia. Sukesukega e kamata i te aso Tapu o te laupaama i te afiafi kae fakaoti i te aso tolu. Fakaavanoa te afiafi o te aso fa mo polokalame o te lotu o te maliu.

Ke fakamanuia mai te Atua ki sukesukega a tatou mo tausaga tenei.

Te ulu saukatoa o sukesukega e penei “KO PUAPUAGA O KELISO, I TUGA-VAE O TE APOSITOLO KO PAULO. (The passion of Christ in Paul’s footprints.)

Ko te fakamoemoega o sukesukega a tatou i te vaiaso Tapu o tausaga tenei ke isi se malamalama o tatou i faipatiga taua kae lauiloa a Paulo e uiga mo puapuaga mo te mate o te tou Aliko ko Iesu Keliso. Ne a fekau fakamalosi e mafai o maua ne tatou mo tou olaga tavini ki tena Tala lei.

E lua a fesili e masani o fakafesiligina faeloa i mafaufau o te kau Kelisiano. Muamua: Kai a e isi ei ne puapuaga i te olaga tenei? Lua Kai a ne fakasaoloto ei ne te Atua ke isi ne puapuaga?

E tokouke a tino ne tali ne latou te fesili tenei, kae e tokotasi te tino mai tino katoa ne tu o tali te fesili faigata tenei, a tena tali e sala kese mai e iloa i tali katoa. A ia tenei ko te Apositolo ko Paulo. I loto i tusitusiga a Paulo e uke a taimi e faipati Paulo ki te muna tenei puapuaga. I muna a te Pope ko Ioane Paulo II, “*a te pogai kai a i te ukega o tusitusiga a Paulo e fakaoga ne ia te muna puapuaga, ona me ko maua ne ia i ona puapuaga a Keliso e kau fakatasi mo ia*”. E se gata i ei kae e pela mo te aoga o puapuaga o Keliso mo niisi kelisiano fakatuanaki e pena foki te aoga o latou mo ia. Mo te apositolo, a te iloa ne ia ona puapuaga se avanoaga foki ko te mea ke mafai ne ia o malamalama i puapuaga ko la e tau atu ki te fakaolataga io me ko te iloa ne ia a puapuaga i te mainaga o te fakaolataga.

ASO TAPU: 13/04 ASO MUAMUA O SUKESUKEGA:

ULU O SUKESUKEGA O TE ASO: “ ME NE A MEA AOGA NE MAUA NE AU I ASO KO TEKA KO TAKU NE AU ME NE MEA SE AOGA KATOA ONA KO AU KO TALITONU KIA KELISO.

TUSI FAITAU: Filipi 3: 7-13

A Paulo e talitonu I te auala ke maua ne ia se polofiti o tena olaga tavini mo Keliso, e tau ke fakase aoga mea lei ne maua ne ia i aso ko teka, e pela mo ana muna ko fai mo sukesukega a tatou i te afiafi tenei. Ona ko te taua o Keliso ki a ia, “ *me ne a mea aoga ne maua ne au i aso ko teka, nei ko taku ne au me ne mea se aoga katoa ona ko au ko talitonu kia Keliso. E se gata fua i mea kona ko taku foki ne au a mea katoa ne mea se aoga ona ko te mea e isi se mea e sili atu tena aoga, tela ko toku iloa lei o Keliso Iesu tela ko toku Aliko. Ko tiaki ne au a mea katoa ona ko ia, ko taku ne au a mea katoa kona ne kaiga fua e iloa ko te mea ke maua ne au a Keliso, ke katoatoa toku soko tasi mo ia. A te amiotonu tela e fakavae i te tulafono ko seai*

nei ia au. Kae nei ko maua ne au a te amiotonu tela ne tuku mai e auala i te fakatuanaki ki a Keliso, ko te amiotonu tela e vau mai i te Atua kae e fakavae i luga i te fakatuanaki. A te mea e manako fua au ki ei, ko te iloa ne au o Keliso mo te mana o tena toetu; ke kaufakatasi au i ona puapuaga, ke pau foki maua i tona mate, i te fakamoemoega ke fakatuakegina mai i te mate ki te ola.”

FESOASOANI MO TE FAI-PEPA:

Muamua A te tusi ki te Ekalesia i Filipi, se tusi ne tusi ne Paulo mai i loto i te fale puipui i Loma. Filipi 1:13, Filipi 1: 12-30). Ko tena uiga Filipi se tusi ne tusi mai i loto o puapuaga. Lua E iloa lei foki e iloa ne Paulo a puapuaga ko la ne fakafeagai mo Iesu i tena mate i sataulo e ui e iloa e seki lavea ne ia ki ona mata kae ne iloa ne Paulo i tena fesili kia Paulo i te auala ki Tamaseko. (Galuega 9: 3-5) ff 4 “ Ne siga a ia ki lalo i te laukele kae ne lagona ne ia se leo e faipati atu ki a ia. Saulo Saulo, kai a e fakasaua mai ei a koe ki au”

Filipi se fakai lasi i te koga fenua o Maketonia kae ne fakatu ne Paulo te Ekalesia tenei i te tausaga ki tua o te 50 TMTK (Tausaga mai tua o Keliso). Ko akoakoaga taua mai i fekau a Paulo ki te Ekalesia tenei ko te loto tasi mo te loto maulalo i mua o te Atua. Loto tasi ko tena uiga ko te tu fakatasi io me ko taumafai ke tasi te olotou mafaufau. I te auala tenei ka mafai ne latou o manumalo i olotou fili.(Filipi 1 : 27, 2:2). E taua foki ke maua ne latou te loto maulalo i mua o te Atua e pela mo te loto maulalo o Keliso. Te fakalavelave lasi i Filipi ko tokouke te potukau tela e teke ki akoakoga a Paulo. A tino konei ne tino Iutaia ko la e fakamafa ne latou akoakoga a te tulafono maise ko te pilitome. Ne fakaigoagina latou ne Paulo ne tino masei io me ko Kuli. (Filipi 3: 2)Te muna Kuli e masani o fakaoga i te feagaiga mua ki tino fenua fakatea. Ne tino e lailai e pela mo te kuli kae e fapaupau). Ona ko tulaga masei ko fai ne tino Iutaia konei ko la ko faka se aoga ne latou akoakoga a te Tala lei ne ala i ei o fakamatala ne Paulo a tena olaga mo tulaga lei katoa ne maua ne ia i te lotu Iutaia ke tali atu ei ki akoakoga a te potukau tenei.

E fitu a tulaga taua ne fakasi ne Paulo i tena olaga i aso ko teka;

1. A ia ne pelitomegina.(pelitome se fakamailoga o se tamaliki tagata ko fai mo tamaliki a Apelamo)
2. Se tino Isalaelu. (Fakamoemoega o tino Iutaia konei ke pilitome ne latou tino fenua fakatea ke fai a latou mo tino Isalaelu kae mo Paulo a ia se tino Isalaelu i tena fanaumaiga. A ia ne pelitome i te valu o aso mai tena fanauga))
3. A ia se tino mai i te gafa o Peniamina.(Se tasi o mata-kaiga mai mata-kaiga e 12. Se matakaiga e gafa-tau tupu me ne vau i ei a te tupu ko Saulo. Se mata kaiga ne fakamanuiagina kae Alofagina ne te Atua (Teu 33: 12). E o te matakaiga foki tenei a te laukele tela e fakatu ei te fakai tapu.
4. Ki te tulafono, a ia se falesaio. (Se potukau o tino Iutaia e malosi i te tausi ne latou te tulafono)
5. Se Epelu fanau mai matua Epelu. (Epelu fakaoga mo tino totino Isalaelu. Niisi taimi fakaoga Iutaia kae ke faka-kese mai tino Iutaia fenua fakatea fakaoga te muna Epelu.)
6. Tena amiotonu ne sala ne ia Kelisiano ke pei ki te fale puipui.
7. Tena amiotonu ki te tulafono e seai sena mea se.

Kae ona ko **Keliso io me ona mo te lei o te Tala lei a Iesu Keliso** muna a Paulo, “*me ne a mea aoga ne maua ne au i aso ko teka, nei ko taku ne au me ne mea se aoga katoa.*” Ko mea

aoga io me ko mea e 7 taua mai luga kola ne maua ne ia, ko la ne polofiti ei tena olaga i aso ko teka ko lau ne ia me ne mea e seai ne aoga. Ko fakaoga ne Paulo te muna e seai se aoga io me se tulaga ko lusi a ia i ei. (liabilities) E pela me se tino fai pisinisi tela e iloa ne ia te ola o tena pisinisi manafai e toese te tupe fakamaimau mai tupe maua e pena foki te kano loto o te faipatiga a Paulo. Tena uiga ko faka-lusi te olaga tavini o Paulo i tena talitonuga ki faifaiga a te lotu Iutaia maise ko te tulafono, ke maua ne ia te su a mea tela e tafasili atu te taua.

“Ko taku foki ne au a mea katoa ne mea e se aoga ona ko te mea e isi se mea e sili atu tena aoga tela ko toku iloa lei o Iesu Keliso ko toku Aliko.” Ko se gata i te faakse aoga ne Paulo a vaega taua e fitu o tena olaga mua kae ke oko ki mea katoa. Mea ko la e fiafia a ia ki ei. E taua te muna a Paulo penei ‘ **tela ko toku iloa lei o Iesu Keliso ko toku Aliko**’ ona ko aumai ne ia se gata fua ko te iloa ne ia Iesu Keliso io me ko te iloa ne ia Iesu ko te Keliso, kae e taua atu ke fakaasi foki ne ia me i a Iesu ko tena Aliko. E fakavae te iloa ne Paulo a Iesu ko tena Aliko e pela mo akoakoga i te Feagaiga Mua. . **A te iloa ne koe te Atua e fakatusa pela e iloa mo te pili o te mafutaga a te matua mo tena tama** Se iloa tela e se gata i te iloa fakate mafaufau, (tauloto fua ne te mafaufau mai fakamatalaga me pela te Atua), kae ko te iloa i loto i te mafuta mo te soko fakatasi. E pena foki te iloa ne Paulo Iesu ko tena Aliko...ko te iloa ne maua mai i te mafuta kae sokotasi a ia mo Keliso i ona puapuaga.

A te amiotonu tela ne maua ne au mai i te tulafono ko seai nei i a au.

Te amiotonu tenei e faipati ki ei Paulo ko te amiotonu e maua mai i te tausi fakamaoni o ia ki fakatapatapuga a te tulafono . E pela mo tulafono ki mea kai.

Muna Paulo au se Falesaio i toku fakamaoni ki tausi ki fakatapatapuga o tulafono. A te amiotonu tenei ko maua ne ia e se ko te amiotonu mai tulafono kae ko te amiotonu e auala mai i te Atua tela e fakavae mai i te fakatuanaki.

A te mea fua e manako au ki ei ko te iloa ne au o Keliso mo te mana o tena toetu. Ko toe fakafoki mai ne Paulo i konei te taua o te iloa ne ia o Keliso e se ko tena Aliko kae ko Keliso mo te mana o tena toetu. Tona uiga ko Keliso manumalo. Ko Keliso tenei te fakavae o te amiotonu a te Atua tela ka maua fua ne ia te amiotonu tenei a te Atua e auala i te fakatuanaki ki a ia. E se se amiotonu ne maua ne ia i tona malosi. Io me pela mo te amiotonu ne maua ne ia i te tulafono. E se gata i ei kae ke iloa foki ne ia Keliso i te kau fakatasi a ia mo Keliso i ona puapuaga. A puapuaga ko te auala e kau fakatasi ei a ia mo Keliso. Ona ko oti ne maua ne Paulo te fakaolataga i puapuaga o Keliso, tena mate mo tena toetu e tau foki la ke kau fakatasi tatou i ona puapuaga ke maua ne tatou te fakaolataga.

FESILI: 1. I te mainaga o te sukesukega a tatou i te afiafi tenei ne a auala ko la e mafai o fakalusi ne koe a koe ko te mea ke maua ne koe se polofiti mo tou olaga tavini mo Keliso?

2. Kae ne a vaega o mea ko la e taua ke faopoopo i tou olaga tavini ka maua mai ei se polofiti?

3. I loto i te olaga o tatou i aso nei e mafai pefea ne tatou o kau fakatasi i puapuaga o tou Aliko ko Iesu? Fakamatala tau tali.

MANUIA TE SUKESUKEGA!!!!

ASO GAFUA 14/04/14: SUKESUKEGA O TE VAIASO TAPU

TE ULU O SUKESUKEGA O TE LUA O ASO: “E TASI FUA TE MEA E FAKAMATAMATA AU KI EI. NA KO TE SATAULO O KELISO”

TUSI FAITAU: Kalatia 6: 11-16

FESOASOANI MO TE FAI-PEPA:

Te mataupu mo fuaiupu ko fakavae ki ei te sukesukega a tatou mo te afiafi tenei ko te toe vaega o te tusi a te Apositolo ko Paulo ki te Ekalesia i Kalatia. A te fakamafa a Paulo j te toe vaega o tena tusi tenei e fakavae mai luga i niisi mataupu taua ko la ne faipatigina ne ia i lotu i tena tusi kae tenei ka fakaotioti ona manatu ki ei. E pela mo te masani o ana tusi, e fakaoti eiloa ne ia te tusiga. Ko tena uiga e kamata tena tusi e faipati ne ia ana muna ki tena failautusi kae ko tena failautusi ko ia tena e tusi ne ia. (Loma 16: 22) Kae ko te taimi e fakaotioti ei tena tusi e masani o puke ne ia te peni mai tena failautusi ko fakaoti ei ne ia tena tusi i se auala tela e malosi tena fekau. 1Kolinito 16 : 21-24) Ana muna i te mataupu e 6 fuaiupu e 11..”**Kiloke ki te lasi o mataimanu e fai ne au kae koi tusi atu au kia koutou i toku lima tonu eiloa.”**

E masani tatou i aso nei i taipa mo computer kafai ne fakamunaga io me se fuaiupu e taua ki a koe io me manako koe ke iloa ne su a tino tena taua e masani o bold type ne tatou ko te mea ke laveagofie kae maise ke iloa ne tino faitau me se fekau e taua. Mo Paulo e seai ne taipa i ona taimi kae ko tusi ne ia ke lasi a mataimanu kona ke faigofie te iloa kae ke masaua faeloa. Tenei te fakamoemoea o tena tusi atu i mataimanu lasi.

Te sua pogai ne manako Paulo ke tusi atu i mataimanu lasi ke iloa ne Kalatia a taumafaiga masei ko la e fai ne tino Iutaia kia latou kae kola foki e taku ne latou i a latou ko faiakoga. A latou konei ne tino Iutaia ko la e faimalo ne latou tino Kalatia ke pelitome. Ko latou kola e manako o fakaasiasi latou kae pati fakamatamata i mataupu i tua. I manatu o Paulo e manakogina ke fakamatala fakalei a faiakoga konei Iutaia ona me ia latou konei e manako fua ke fuli atu a tino Kalatia ke pelitome ke tokuke te fuainumela o latou kae ke lavea mai foki a latou ne tino. Kae e seki ai eiloa ne mea lei ne fai ne latou mo tino Kalatia. E pela mo Paulo ne lamatia tona ola i te fakatino ne ia mo Kalatia galuega o te alofa tauanoa o te Atua i te folafola atu te Tala lei a Keliso kae e se saga ki ei Kalatia.

A te fakamunaga **A tino kola e faimalo ne latou koutou ke pelitome**. A te **muna faimalo io me ko te anagkazo** ko tena uiga ko te faimalo pela me se mea ke fakamafa faeloa ne latou ki mafaufau o Kelisiano i Kalatia. A te fakaogaaga o te muna tenei e tu i te tulaga o se mea tela e fai i te taimi nei (present tense)e se ko te taimi ko fano. Ko tena uiga Paulo e fakamalosi ne ia Kalatia e uiga ki te faimalo tenei e fai atu ne tino Iutaia se mea e fai eiloa e fai eiloa e se gata. Kae e ola eiloa kae e ola eiloa.

ko tino kola e manako o fakaasiasi latou: Te muna manako (desire) I te gana Eleini ko te **Thelo** (e se se simple wish kae ko te totally committed to do it. Ko tena uiga a tino Iutaia konei ne manako malosi kii ke pilitome ne latou tino Kalatia .Se vaega maankoga tela e isi se mea mai tua tela e fakamoemoe ke tupu. Ko te vaega manakoga tela ko tukutasi katoa olotou lotu malosi mo olotou taimi ke fakaasiasi latou io me ke lavea latou.

A te muna fakaasiasi latou ko te muna Eleni ko **te Euprosopeo io me ko te euprosopon**. Eu ko tena uiga lei io me gali kae ko te prosopeo ko te mai luga io me ko te surface, io me ko te foliga appearance. (Kiloga mai tua) Tenei te mea e fakauiga ki ei Paulo ko te foliga fua i tua. Ko te koga fua se loto i loto kae e masa fua i luga. Mo Paulo Kalatia a faiga kona e fai ne tino Iutaia ki a koutou ke pelitome ne faiga ke lavea latou i tua e lei. Ne faifaiga fua ke lavea olotou foliga i tua e lei kae i loto ne faiga lailai me manako fua ke isi ne olotou tino. A faiga i loto ne faiga o te foitino e se ne faiga faka te -agaga.

Kae ko faiga foki kona e fakamatamata ei latou. A latou e fakamatamata ona ko tulaga maluga o te pelitome i te sosaiete o tino Iutaia kae maise e fakamatamata foki latou ona ko olo keatea Kalatia mai i te alofa tauanoa o te Atua ia Keliso.

E fai ne latou ko te mea fua ko latou ke se fakasauagina mo te sataulo o Keliso.

E iloa lei ne Paulo me i tino Iutaia konei e fai ne latou a uiga konei ona ke se fakasauagina latou ne niisi tino Iutaia ko la e ita ki tino Iutaia e talai ne latou te sataulo o Keliso. Kae maise e iloa tino maluga o te lotu Iutaia ko la e nofo i Ielusalema.(Te mea ne tupu kia Petelu i taimi ne aumai ei Iakopo mo niisi tino Iutaia mai Ielusalema. Kalatia 2 :) Seai la se Iutaia e fia fakamatamata i te sataulo o keliso me aumai fua ne ia a puapuaga ki tena olaga kae e sili ke fakamatamata latou i tulafono me ko tausisi o latou ki manakoga o tulafono e tavae ei latou ne niisi tino Iutaia. Tela la a te pelitome ko fai pela me se auala e fakasao ei tino Iutaia mo Kelisiano o fenua fakatea mai fakasauaga a te lotu Iutaia mo te Malo o Loma.

Te lotu Kelisiano i te kiloga a te malo o Loma se vaega o te lotu Iutaia tela te pelitome se mea e tau me e taku latou ko tino o te lotu Iutaia tela e talia i tulafono a Loma ke talai. Kae kafai e teke ne latou te pelitome tena uiga a latou ne tino o se lotu e kese mai i te lotu Iutaia tela e tau o fakasauagina a tino ko la e se talia ne latou te pelitome. (Galuega 18: 14-16)

I te fuaiupu e 13: **E oko foki kia latou kola e fai ne latou te pelitome, e se fakalogo latou ki tulafono.** E fakafoofogina te fuaiupu tenei me e iloa ne tatou tino Iutaia konei e fakamafa ne latou ko Kelisiano i Kalatia ke fakalogo ki tulafono kae ko latou muna Paulo e se fakalogo ki tulafono.

Te fakalavelave e talai ne latou a te taua o te pelitome mo te manatu fua ke sao latou mai fakasauaga kae se fakamaoni o tausii a tulafono katoa maise ko fakataputapuga o meakai mo aso fakatu.(Iakopo Kalatia 5:Mo Paulo a latou e fai ne latou a mea konei ke fakamatamata latou i kelisiano konei ko talia ne latou ke pelitome latou kae mo Paulo e tasi fua te mea e fakamatamata a ia ki ei, na ko te Sataulo o keliso. I te faipatiga a Paulo e fakaasi ne ia te mafaufauga tela i te fakapaupau o ia mo niisi faiakoga Iutaia ke mo a e iloa e isi se mea e fakamatamata a ia ki ei, vagana ko te sataulo o Keliso.

Kae e pela mo au, au e fakamatamata fua e uiga mo te sataulo o te tou Aliko ko Iesu keliso,

Ko te pogai la e fakamatamata ei Paulo i te sataulo o Keiso ona a te satulo ko te auala tena o tena fakaolataga. A te sataulo o Keliso ne fakamagalo ei ana agasala. (1 Kolinito 1: 17-18, Kalatia 3: 1, Filipi 2:8)

me e auala i tena sataulo a te lalolagi ko mate ki au, kae ko au ko mate ki te lalolagi.

E fakaasi mai ne Paulo i ana muna ona ko te sataulo o Keliso, te lalolagi ko mate ki a ia kae ko ia foki ko mate ki te lalolagi. Ko tena uiga a te sataulo o Keliso ko oti ne sui ne ia tena olaga. Ona ko te mea tela ne tupu i taimi tela ne Sataulo ei Keliso ko ala ei o penei a ia i te taimi nei. (Ko fuli tena olaga) A te mate o te lalolagi ki a ia ko te lalolagi o tena olaga i te lotu Iutaia. Ko te lalolagi o tulafono. Ko te lalolagi tela e masani o pule i a ia. Ona ko te sataulo o Keliso ko oti ne mate te lalolagi tena ki a ia. A ia foki ko oti ne mate ki te lalolagi. E manino i manatu o Paulo me ko taimi ne fetau ei laua mo Keliso, tena foki taimi ne fakasataulogina fakatasi ei laua mo Keliso. Tela la ko seai se pule a te tulafono i luga i a ia. (Kalatia 6:14)

E se afaina eiloa me e seai io me se tokotasi e pelitomegina, a te mea e taua ko te fai mo se mea ola fou. Ko takotonu ne Paulo me e se taua te pelitome kae taua ko te fai o te tino mo se foafoaga fou. Se tino tela ko ola i se lalolagi fou. I te gana Eleni e lua a muna e masani o fakaoga mo te fou. Muamua ko te neos tela ko te fou o se mea e togi mai ne koe kae e se fou kia koe ona e isi sau mea pena pela io me ko isi ne mea pena pela mo se motoka e togi ne koe e fou e se lailai kae e se fou me ko uke a motoka. Ko te su a muna Eleni mo se mea fou ko te kainos. Te muna tenei e masani o fakaoga i te Feagaiga fou ki te muna Feagaiga Fou. Tenei te muna ne fakaoga ne Paulo ko te kainos..ko te fou tela e seki lavea eiloa. Se brand New creation. I so se taimi e lavea ne koe te muna fou tela e sokotaki mo te sokoga o tatou mo Keliso a te muna tena fou ko te kainos. Ko te fou tela e seai ake eiloa i ona tafa kae e loto tena fakauigaaga.

Muna Paulo ko fai tatou mo foafoaga fou ona ko te alofa taunoa o te Atua mo te fakatuanaki fua ki a Keliso. Tela la ka fai se tino ko i a Keliso a ia se foafoaga fou. (2 Kolinito 5: 17) A te fai se tino mo foafoaga fou a Keliso e se mafai o toe fuli. Kae Ko Keliso fua e mafai o fai ne ia tatou mo foafoaga fou. I manatu o Paulo a tatou ko fuataga o te sataulo o Keliso.Ko tena uiga tatou nei ko foafoaga fou. Tela la me pelitome me se pelitome tatou muna Paulo e se afaina ona e seai se mea e mafai o fai ne te pelitome ke fai koe mo foafoaga fou kae ko te fakatuanaki fua ki a Iesu.

FESILI: 1. Fakamatala me ne a ou mafaufauga io me ko ou lagona ki te faipatiga tenei a Paulo. (Kalatia 6: 11-17) Se a te mea pela e fialia malosi koe ki te faipatiga tenei a Paulo fakatau ki tou olaga fakakelisiano. Kai a?

2. Fakamatala ki tou malamalama mo tau mataupu silisili totino eiloa. Se a te taua o te muna pela a Paulo “A te lalolagi ko oti ne mate ki au. A au foki ko oti ne mate ki te lalolagi? Kae e mafai pefea o mate tatou ki te lalolagi i aso nei?

3. Fakamatala me pefea o aumai ne tatou a te faipatiga penei a Paulo o fakauiga ki tou olaga. “kae ko au e tasi fua te mea e fakamatamata au ki ei na ko te Sataulo o Keliso”. E fakamatala ne koe pefea ki te olaga tenei o tatou i aso nei. (Application)

ASO LUA 15/4/14 SUKESUKEGA O TE VAIASO TAPU

TE ULU O SUKESUKEGA O TE TOLU O ASO: A TOKU ALOFA TAUANOA E LAVA LEI EILOA MO KOE

TUSI FAITAU: 2 KOLINITO 12: 1-12

I te mataupu tenei e 12 e tumau Paulo o teke ki apositolo loi ko la e se talia ne latou tena tulaga Apositolo. E nofo i te mafaufau o Paulo te alofagina o ia ne te Atua i se auala tela e kese tena fakaasi atu ki a ia. I lagona o Paulo a te Atua ne fakaasi atu ki a ia i se auala tela e maua ne ia te loto maualalo kae seai se loto fakamaualuga. Mo te pogai tenei ne filifili ne ia te fiafia o ia ki ona puapuaga mo faigata ona ko te Tala lei. I te mataupu e 11 ne faipati Paulo e uiga mo ona puapuaga ona ko te Tala lei a Keliso. I te otiga ne faipati ne ia ona puapuaga ona ko Keliso ne faipati ne Paulo a fakasiga ne maua ne ia.

2 Kolinito 12: 1. **E tau mo au o fakamatamata kae e tonu me seai se mea e maua mai i ei.** E tonu te fakaasiga a Paulo ona ko tulaga taua ne tavini a ia mo Keliso. Maise loa ona kini mo falepuipui lamatia tena ola. Ke oko foki ki fakaasiga mai te lagi e uke taimi ne maua ne Paulo. A tena fuliga ne mafua mai i fakasiga mai te lagi. Galuega 26:19) Ne lavea foki ne ia se fakaasiga i Teloa i te tagata mai Maketonia ne kalaga atu ki a ia ke fanatu o lauga i kona (Galuega 16: 9) Te Aliko ne faipati atu ki a ia i se fakasiga ke nofo a ia i Kolinito me i te Atua e isi ne ona tino i kona. (Galuega 18:9-10) A fakaasiga konei mo fakatonutonu, akoako kae fakamalosi ei a Paulo ona ko Talaiga o Tala lei. Se muna ke fakamatamata a ia i ei e seai me ko te Atua ke oko ki te fakaasiga tenei ne avaka-ola a ia ki te lagi.

2 Kolinito 12: 2-3. Ko faipati Paulo ana muna e iloa ne au me isi se tagata Kelisiano ne ola ake mo Keliso. Paulo ne faipati fakauiga ki a ia I te 2 Kolinito 12:7E fakaasi mai me fakasino ki a ia. Ana muna” E iloa ne au se tagata Kelisiano ia Keliso. Tena uiga se tagata tela e fakatuanaki ki a keliso kae ko te malu mo tavaega katoa e fai ne ia e mo Keliso. Me e seai foki ne fakamanuiaga mai te lagi io me ko fakaasiga mai te lagi e aumai mo se tagata vagana mo tavaega o Keliso. (Efeso 1: 3) Paulo ne avaka ki te lagi sautua tolu tela ko te nofoaga o te Aliko Tapu.. tela foki e nofo ei agelu tapu, tela e nofo foki ei Keliso malu. Ko te koga foki tena e fano ki ei te kelisiano fakatuanaki ma oti atu i te olaga nei. 2 Kolinito 12:4 E fakaigoa ne ia ko palataiso. (Luka 23: 43) Ko niisi e fai pela te lagi sautuatuolu e mai luga aka o te lagi tela e lele ei a manu eva.

2 Kolinito 12: 4. **Kae ne lagona ne ia i kona a mea ko la e se mafai o fakamuna i gana a tino.** A Paulo ne seki faipati ki mea ko la ne lavea ne ia kae ki mea ko la ne lagona ne ia, kae ne fakaigoa ne ia a te gana mo pati e se mafai o faipati ki ei se tino. (Tena uiga e se mafai ne se tino o faka leo, e se mafai foki o malamalama). E ui e iloa e faipatigina i mata o tino kae se mafai o faipati ne ia. E se ko te manatu me se mafai ona te tagata e agasala kae ko te gana ko te gana fakate lagi. Ikai kae ona ko te mea e se mafai ne ia io me se isi mea ne faite o malamalama, vagana ko fuli olotou foliga ke pau mo ia Iesu. (1 Kolinito 15: 50-51)

2 Kolinito 12:5 **Tela la, ka fakamatamata au i te tagata tenei, kae se fakamatamata au e uiga ki au e iloa vagana ko oku vaivaiga.** I te lagona tenei o Paulo ne fakaaloalo kae fakaekegina Paulo ne te Aliko. E ui e iloa ko tau te tavaegina mo te fakaekegina ki luga o Paulo ne te Atua kae e iloa ne Paulo me se tau e iloa ki a ia se vikiga io me se taua o ia. Ne maua ne ia te alofa tauanoa mo te alofa fakaola ia Keliso. Kafai se mea ke tavaegina ei a ia e seai kae ko ona vaivaiga. Ko tena uiga ko mea ko la ne puapuagatia ei a ia ke tavaegina te

Atua. A ia ne tavini fakamaoni ki te Tala lei ke oko eiloa ki te tulaga fakamataku ko lamatia ei tena ola. (2 Timoteo 4: 5-8)

2 Kolinito 12:6 **Kafai e manako au o fakamatamata e se tau mo au o fai mo vale... Ke se toe manatu mai se tino ki au manafai e kilo mai ki au io me fakalogologo mai manafai au e lauga.**E lavea te loto maulalo o te Apositolo i ana muna i te fuaiupu tenei. Me kafai e fakamatamata a ia ona ko fakasiga ne lavea ne ia, a ia e se se vale, me e seai se mea e fakamatala ne ia kae na ko te mea tonu. Ko te tala tonu o te mea ne tupu. Te mea e taua mo Paulo ko te ave keatea ne ia a lagona ko la ka fai ne ia fakaasiga a te Atua i se auala tela ka kilo atu a tino ki a ia a ia pela me se ko ia, kae pela a ia se tino maluga. Mo Paulo a ia se tagata agasala ne fakaolagina i te alofa tauanoa o te Atua. (Efeso 3 : 7-8, 1 Timoteo 1 : 15, zloma 7: 24)

2 Kolinito 12: 7: E fakaasi mai i te fuaiupu e 7 me e taotaofi eiloa ne te Atua te fakamatamata o Paulo mo a e pusa ki tua ona ko te maluga o fakaasiga ne lavea ne ia mo ana mealofa e auala i te aumai ne ia se suki ki tena foino. Te fakamatamata se lagona e ola i tino katoa ke oko ki tino talitonu kae ke puipui a ia mai i te agasala tenei tela e se fiafia ki ei te Atua, (Faigamuna 6: 16-18 (Faigamuna 16: 18-19), Ne ave ne te Atua se suki ki te foino o Paulo pela me se avefekau a satani ke mo a e fakamatamata a Paulo. E iloa ne tatou me ne fakasaoloto ne te Atua a puapuaga konei. E se iloa tonu kae ne fakalavelave ki tena foino kaati ne masaki. I te tala o Iopu e lavea ne tatou ne fakasaoloto foki ne te Atua a satani ke fano o tofotofa kae fakapuapuaga Iopu, ke oko ki tena foino ne fakamae foki ne satani. E pena foki a Paulo. (Loma 8: 28) Petelu).

2 Kolinito 12: 8-9: E fakatolu taimi ne talo Paulo ki te Atua ke ave keatea a suki makaikai konei a satani. Tolu taimi o talosaga talo mo te loto katoatoa. Kae ne seki talia ne te Atua. Ana muna kia Paulo a toku alofa tauanoa e lava lei eiloa mo Koe. Tena alofa tauanoa e lava kae toe mo fakamalosi kae puipui a ia. Mai tafa i ei a te malosi o te Atua mo tena alofa tauanoa e se mafai o fakalasi atu te tavagina sei vagana ko iloa ne tatou a tou vaivaiga mo tou se mafai. Tela la muna Paulo, Au e fakamatamata kae talia oku vaivaiga ko te mana o Keliso ke tumau i luga i au kae ke fakaasi i luga i a au. (2 Corinthians 12: 9b)

I te fuaiupu e 11-12 muna Paulo, **“Ko oti au ne fai mo vale ne fai ne koutou kae ko koutou ne tau o talia kae lago ne koutou au me ui au se mea fua e seai, au e se mailalo o latou ko la ko fai mo otou apositolo fakapitoa.**

Te vaega o te faipatiga tenei a Paulo i te te 11-12 ko te tali atu a Paulo ki manatu o latou kola e fakase ne latou a te tulaga tavini o ia, io me ko tena fai mo Apositolo. Kelisiano i Kolinito e fakapaupau ne latou Paulo mo niisi tino e fai foki i a latou ne apositolo kae ne lavea ne latou i a Paulo e malalo i a latou konei. Te fakalavelave tenei i Kolinito e pau foki mo te fakalavelave i Kalatia. (Kalatia 1-2) Kae, e pela mo tena tali ki te Ekalesia i Kalatia e pena foki tena tali i konei i tena tusi ki te Ekalesis i Kolinito. I manatu o Paulo a ia e se mai lalo o latou konei e fakase ne latou tena tulaga apositolo. Mo Paulo, e mafai a ia o seki akoga i te faiga o lauga maise ko lauga fakaotia kae ki mataupu ki te poto mo te atamai. A ia ne akoga. (2 Kolinito 11: 6) Tela la a tena mea e fai a a ia ka tumau o fai mo apositolo ke ave keatea a lagona o latou ko la e fia fakapaupau olotou tulaga faka-apositolo mo olotou fakamatamata fua. Ko tino fakamatamata penei e se ne apositolo tonu kae ne tino fakase tino ko la e ufi

olotou foitino ke fai mo apositolo a Keliso. (2 Kolinito 11 : 12-13) Mo Paulo e mafai a tino o fakamatamata kae e seai se mea e maua mai i ei. Tela ne fakaoga ne Paulo a te fakamatalaga o fakaasiga lavea ko la ne fakaasiga mai te Aliko ke mafai o agai atu ne ia latou konei.

E tasi o uiga masani o tino i te vaiitimi tenei o Paulo maise ko mystery religionists a fakaasiga e maua ne latou e masani o funa me ne fakaasiga e fakafoofogia kae e tapu te fakaasi, ona me ko mea ko la e se oko ki ei te iloa o tagata ola kae e se manakogina foki ke toe fakafokifoki.(2 Kolinito 12: 4) Tenei foki te pogai e taua mo Paulo ke fakamatala ne ia a fakaasiga ne maua ne ia se mo ona fakamatamata kae ke iloa ne latou konei e se talia ne latou tena fai mo apositolo kae kola foki e isi ne fakaasiga mai te Atua kae funa me e se malamalama latou i ei, me i tena iloa i mea tupu i tena olaga talitonu ke oko ki fakaasiga mai te Atua (religious experience) e pau e iloa te malosi mo latou.

E uke foki i te vaiitimi tenei o Paulo a tala aveave penei ki fakaasiga mai te lagi kae e iloa lei foki ne Paulo i tena tala tenei ki fakaasiga ne lavea ne ia mai i te Atua e maluga atu tena tulaga i lo tala a latou ko la e teke ki a ia. Setioa o fai atu Paulo Au e se mailalo ifo o latou konei, e ui a au se mea fua e seai. (2 Koli 12:11) Te fakamunaga Au se mea fua e seai e se ko tena uiga ko seai se fakamoemoega o Paulo io me ko fakafiti ne ia tena fai mo apositolo. Ikai, kae ko te fakaasi ne ia me takotonu ne ia tena fai mo apositolo ne seki maua ne ia i a ia e iloa kae ne maua ne ia i luga i a Keliso toetu. Mo Paulo ko te tulaga utufia o se tagata i fakasiga mai te Atua e se ko mea ne fai ne ia kae ko te fakasiga o Iesu toetu tela e tu mai mo ia.(2 Kolinito 12: 6-7)

FESILI: 1. Ne a akoakoga taua kola e mafai o maua ne tatou mai tou sukesukega tenei?

2. Kafai e fakapau ne tatou mo te uke o tala ki fakaasiga e lavea ne tino e uiga mo tino mate kae fano ki te lagi mo tala i mea e tupu i te lagi e mata e talitonu koe ki ei me ikai? Fakamatala me kai a.

Se a tau mataupu silisili i a koe e iloa ki te muna a Paulo penei Tela la ka lasi toku fiafia o fakamatamata i toku feitu vaivai, ko te mea ke i luga i au a te mana o Keliso. Se a te tonuga o ana muna?

KE MANUIA TE SUKESUKEGA!!!!

ASO TOLU : 16/04/2014: SUKESUKEGA O TE VAIASO TAPU

TE ULU O SUKESUKEGA O TE TOE ASO/ASO TOLU: KO TE MEA KE SE TOE FAI PELA ME KO AU TELA E OLA KAE KO KELISO TELA E OLA I LOTO I A AU.

TUSI FAITAU : KALATIA 2:15-21

I te mataupu e 2: 15-21 E lavea ne tatou me tenei te tali a Paulo ki uiga o Petelu tela ne seki manako ke kai fakatasi a ia mo tino fenua fakatea i Anitioka. Te finauga tenei a Paulo se kiloga fakamataupu silisili te la e agai atu ki uiga o Petelu kae se gata fua ia Petelu kae se akoakoga foki mo tino ko la ko fai mo kelisiano io me tino Kalatia ko la ko oti ne talia ne

latou olotou akoakoga. Muamua ne fakapau ne Paulo a ia mo latou konei e finau mo ia (ff15” A tatou..”) e auala i te fakaasi ne ia se akoakoga tela e talia katoa ne tino Iutaia me tonu e pela mo te tino e tuku tonu fua mo te Atua e auala i te taulaga- fakalogo muna ne fai ne Iesu Keliso.(Christ obedience sacrifice) Fakamaoni o Keliso lei katoatoa o te fakamoemoe o Keliso ki te loto o te Atua= Fakamaoni o Keliso) Ona la ko te tulaga tenei e manakogina la te fakatuanaki ki a Iesu e fakaolagina i ei kae e se ko te fakalogo ki te tulafono. C.f ff 15-16: “**A tatou ne fanau mai ne tina tino Iutaia tonu e iloa, kae e se ne tino agasala o fenua fakatea, e pela mo te mea e fakaigoagina. Kae e ui ei ko iloa ne tatou me i te tino e tuku tonu fua mo te Atua e auala i te fakatuanaki ia Iesu Keliso, kae e se mafai lele e iloa e auala i te faiga o mea e manako ki ei te tulafono.**” Ko te fakalavelave kafai e fakaoga ne te Kelisiano a te akoakoga tenei i olotou olaga tela ko te ola o latou mai lalo o te alofa tauanoa kae se mai lalo o te tulafono ko tena uiga ko fakaseaoga ne latou te tulafono a te Atua, tela se agasala te faifaiga tena kae e fakaasi foki ne latou me ko Keliso ko te fakamafuaga o te agasala tena.

ff 17 **Kafai la e taumafai tatou o tukutonu mo te Atua it e soko tasi o tatou mo Keliso ko maua ake ei ia tatou ne tino agasala e pela mo tino fakatea. E a e fakauiga a te mea nei me ia Iesu e tautua mo te fakamoemoega ke agasala?)** ona me ko ola mai lalo o te alofa tauanoa o Keliso. Tena uiga ko se ola mai lalo o fakataputapuga o te tulafono tela te mea ka maua ne latou ma seai se fakataputapuga ko te faivalevale mo te agasala. Mo Paulo e se tonu te mau tenei.E se ko Keliso te mafuaga o te agasala kae ko tino tausi ki tulafono. A latou e nofo mo te manatu ko te tausi fakamaoni latou ki tulafono ka fakauke ne latou a fakamanuiaga mo folafolaga(promises) a te Aliko, kae se tenei te tonuga. Mo Paulo a te manakoga ‘nau tenei o latou ko te fakamafuaga tena o te agasala kae e taki ne ia latou ki te teke ki te Atua mo te mate.

ff18 **Kafai e kamata au o toe faite a faifaiga o te tulafono tela ne ofa ne au ki lalo i kona ko fakaasi atu i ei i au se tino ofa tulafono.** I konei ko fakaasi ne Paulo a te malosio o tena teke atu ki tino Iutaia ko la e manatu me i a Keliso ko te fakamafuaga o te agasala. Ko oti ne tiaki ne Paulo te tulafono tela ne ‘nau tena loto ki ei kae ne fai ne ia ke teke ne ia te Atua e auala i tena teke ki te Tala lei a Iesu Keliso. Te uiga ote faipatiga a Paulo e se ko Iesu kae ko te tulafono tela ne fai foki ne ia ko ia ke teke ki te Atua. Kae ko te tulafono tena tela ko oti ne ofa ne ia ki lalo. Te muna ofa ki lalo, e masani o fakaoga i faipatiga a faiakoga o tulafono e fakauiga ki te se talia se manatu e uiga mo se fakamatalaga o se vaega o tulafono. Mo Paulo e pena foki, ko oti ne ofa ne ia ki lalo a tulafono i tena tulaga katoatoa tela ko te torah...e se ne vaega foliki o tulafono o meakai mo aso fakamanatu Ikai. Ko oti ne se talia ne ia se manatu o tulafono saukatoa.

E pefea e iloa a au ko mate ne tamategina ne te tulafono e iloa ko au ke ola mo te Atua. Ko oti au ne tamate fakatasi mo Keliso i tena sataulo, ko te mea ke se toe fai pela me ko au tela e ola kae ko Keliso tela e ola i a au. Te mate o ia ki te tulafono ko te molimau fakamaoni tenei a Paulo ki tona tulaga se toe fakalogo a ia ki tulafono. A te ola tenei ko te maua ne tatou te ola fou i tena katoatoa i a Keliso. Ke maua ne tatou a koloa tumau o Keliso(Efeso 3: 8). E o tatou e iloa fakamanuiaga ne maua mai i a Keliso mai tafa o tulafono.

A te tino talitonu e tau o ola i te fakatuanaki. Ko tena uiga e maua ne tatou te ola fou tenei i te ola tatou i luga o te fakamaoni o te tama a te Atua, tena mate e sui ei tatou. ff19-20. I te fuaiupu e 21 ne fakaotioti te finauga a Paulo i te manatu me i tena Tala lei e se ave ne ia keatea te loto alofa o te Atua i tena mealofa o te tulafono. Te pogai ona ko te tulafono ne seki mafaufaugina pela me se meafaigaluega ke faite ne ia te takuamionugina, io me ko te tuku tonu mo te Atua se polokalame tela e fakatonu ne ia a mea katoa ke tonu i a Keliso. Te tulafono e seai sona malosi ke taofi ne ia te agasala.

E lavea ne tatou te taumafaiga tenei a Paulo Kalatia (2: 15-21) ko te ata o te finauga Paulo o tali atu ki a Petelu mo ona mata ko la i Kelisiano i Kalatia ko la latou ko pela mo Petelu ko oti ne talia ne latou kiloga fakamataupu silisili faka-Iutaia. A tino Iutaia konei se vaega o Iutaia tausi ki tulafono. Ko latou e fakamafa te pelitome. Latou tausi ki tulafono (3 :10) ko latou e tausi ki aso fakamanatu aso fakatu mo masina(4:10) manako o nofo mai lalo o tulafono(4:21) Kae mai mea katoa latou e taumafai ke taku-amionugina latou i te tulafono. (5:4. A latou e manatu i te tu fakatasi latou mo te Atua, te fakamanuiaga o latou ko tino o te Feagaiga i te fakamanuiaga Apelaamo e maua fua ne latou manafai e fakalogo latou ki tulafono a Mose. A te fai latou mo tino o te Feagaiga se vaega o te alofa tauanoa o te Atua tela e fakavae i luga o te fakamaoni o Keliso kae e maua i te fakamaoni ki tausiga o tulafono.

I se kiloga faigofie, a te takuamionugina o te tino, e pela me se fakamagaloga o agasala ko teka. Te fakalavelave kafai e faipati ki te fakatumau te tu i te Feagaiga, fakaseai te agasala mo te faiga o tino ke ma kae tapu e se maua i te alofa tauanoa o te Atua kae e maua i te fakalogo ki tulafono. I olotou manatu a te fakafoliki ne Paulo te taua o te tulafono se auala fua ke ave keatea a fakataputapuga o te tulafono kae ke fakamaluga aka i ei te agasala. Ko tena uiga i olotou manatu kafai la ko te alofa tauanoa fua o te Atua te mea e taua ko lei la manafai e fakatumau e iloa tatou i te agasala kae agasala ke fakamaumea i ei te alofa tauanoa o te Atua. (Loma 6:1) Ne fakaoga ne Paulo se vaega style o faipatiga tela e muamua ne kote ne ia Petelu kae oti ko toe tumafai a ia o faipati fakalei kae e aumai ne ia te la tulaga laua ne tino Iutaia e iloa kae ko fai mo Kelisiano. (conventional rhetorical style) Te fakamoemoega ke lavea mai foki ne tino fenua fakatea kae ko fai mo kelisiano i Kalatia te se tonu o te mea ko fai ne latou e pela latou mo Petelu ko oti ne talia ne latou akoakoga se a te kau Iutaia.

FESILI: 1. Fakamatala me se a tau kiloga faka-mataupu silisili ki uiga fakaasi o Petelu i Anitioka ko la ne kote ei a ia ne Paulo, kae ne a akoakoga taua mo tou olaga fakakelisiano?

2. Fakamaina aka me ne a ou manatu ki mea konei koi fai mo tulafono a te kau Iutaia ko la e manakogina ke ofa ne tatou ki lalo i tou olaga tavini mo te Tala lei a Keliso?

3. Fakaasi aka auala e mafai o fakasataulo fakatasi tatou mo Keliso i tou olaga?